


Bimbang kesan penularan kejatuhan bursa China



» **RITA BENOY
BUSHON**

» **Jumlah besar dagangan KL-Beijing boleh jejas pasaran tempatan**

Statistik terkini menunjukkan eksport Malaysia menurun 6.7 peratus kepada RM60.6 bilion pada bulan Mei 2015 berbanding setahun yang lalu, penurunan 8.8 peratus berasaskan tahun ke tahun yang dicatatkan pada bulan April lalu.

Keadaan ini turut memberi tekanan terhadap angka akaun semasa serta keadaan defisit fiskal semasa yang terus memberi tekanan kepada ringgit.

Sudah jelas, harga minyak mentah dan komoditi yang lemah (seperti minyak dan gas, kelapa sawit, getah asli dan produk berasaskan kayu balak) turut menambah tekanan kepada ekonomi.

Di China pula, pasaran saham menjunam dengan arah aliran yang menurun secara mendadak baru-baru ini adalah penurunan terburuk dalam tempoh 20 tahun.

Langkah drastik yang belum

dilakukan sebelum ini oleh kerajaan China untuk melindungi saham sudah diambil seperti menghentikan dagangan di pasaran awam.

Kelegaan sementara

Hampir lebih daripada separuh saham tersenarai di dua bursa saham utama China kini dihentikan dagangannya yang memberikan kelegaan sementara kepada pemilik saham, tetapi menimbulkan keimbangan bagi pemegang saham minoriti kerana mereka tidak diberikan peluang untuk menjual pegangan mereka.

Keadaan itu juga tidak memberikan mereka peluang untuk membeli lebih banyak saham pada harga yang lebih murah jika mereka berhasrat untuk berbuat demikian.

Kami berpandangan sentimen dalam pasaran saham mencerminkan persepsi pelabur terhadap fundamental penting dalam ekonomi sebe-

nar.

Kebimbangan kami lebih tertumpu kepada kesan penularan yang boleh menimpa pasaran kita, mengambil kira jumlah dagangan yang besar di antara Malaysia dan China.

Akhir sekali, saya ingin menyentuh mengenai tadbir urus awam. Kami berpandangan tadbir urus awam sangat penting, mungkin lebih penting daripada tadbir urus korporat, memandangkan ia menetapkan nada daripada tahap teratas.

Kami ingin melihat tahap tadbir urus awam yang terbaik dan boleh dijadikan contoh dalam persekitaran ekonomi yang tidak menentu ini supaya ia boleh mewujudkan keyakinan di dalam pasaran untuk jangka panjang.



Penulis

ialah Ketua Pegawai Eksekutif Kumpulan Pemantau Pemegang Saham Minoriti (MSWG)

AirAsia galak pemeriksaan masuk sendiri

AirAsia dan AirAsia X menggalakkan penumpang yang membuat perjalanan sepanjang tempoh sambutan Aidilfitri supaya melakukan pemeriksaan masuk sendiri dan tiba awal di lapangan terbang.

Dalam satu kenyataan semalam, kedua-dua syarikat penerbangan terbabit berkata langkah itu akan membantu melancarkan semua urusan dan mengelak daripada kesesakan yang dijangkakan ekoran ledakan jumlah penumpang sepanjang tempoh berkenaan.

Katanya, penumpang dicadangkan tiba di lapangan terbang sekurang-kurangnya tiga jam untuk penerbangan AirAsia dan empat jam bagi AirAsia X sebelum masa pelepasan ditetapkan untuk penerbangan masing-masing.

“Gunakan perkhidmatan laman web, mudah alih atau buat pemeriksaan masuk sendiri untuk memudahkan perjalanan. Penumpang juga dicadangkan supaya mencetak pas masuk masing-masing sebelum tiba di lapangan terbang,” kata kenyataan itu.

Sementara itu, dalam kenyataan berasingan, AirAsia dan AirAsia X akan terus memantau perkembangan keadaan taufan Chan-Hom dan pelanggan yang memerlukan maklumat boleh menghubungi melalui laman webnya.